

ЕГОР РОЧЕВ


# ЛЕВА



ЕГОР РОЧЕВ


# ЛЕВА

Висътъяс



КОМИ КНИЖНОЙ ИЗДАТЕЛЬСТВО  
СЫКТЫВКАР 1972





## ЛЕВАЛЫ ГАЖТӨМ

**Л**ева тшөкыда кольлө өткөн, дерт, оз тундра шө-рө — чумө, но сылы и сәні гажтөм. Детинкалөн эм уна чой да вок, но ставныс найө сиктынөсь, ветлөны школаө. Тани эськөн и олө ыджыдджык чойыс, Маринаыс, но сийө детинкалы абу пөв, мамлы отсасьө, пусьө да пөжасьө.


Лева бовъялыштис дадьяс гөгөр, весиг мамыс дадь вылө нюжөдчылис, дыр видзөдис енэжө. Сән нинөм эз тыдав: ни шонди, ни төлысь, ни кодзув. Лева төдө нин — лунын ни кодзув, ни төлысь абуось, шойччөны гортаныс, сөмын вой кежлө петавлөны дежуритны батыскөд өттшөтш көр стада динө. Но мыйла абу шондыс? Мукөд луннас тай оз и куньлы синсө, дзоргө да дзоргө, сәтшө-ма югъялө. Левалөн ни өти чача на сәтшөмыс эз вөвлы. Вөли кө шондыс матын, Лева эськө век шыльөдис-мала-

ліс сылысь зарни мышсö. Кöни öни сійö? Висьмис? Нуисны больничаö вертолётöн? Коркö тай нулісны жö сылысь мамсö, висьмис да.

Детинка матыстчис дадь вылын куньгыртысь кыньпилань — сійöс неважөн кутісны, быдтыны көсйöны. Сöмын, кажитчö, кыньпи узьö, а сідзисö быд сөн сылөн вөрö и немтор оз коль казаявтöг. Пыр и чошнитчис Лева вылö, синкым увтіыс скöра видзöдö. Детинкалы важөн нин окота тöдмасьны кыньпикöд, но польштö, эз на вун коркöя öбидаыс — варснитліс дöбельки чуньсö. Кыньписö көть и домöма чеп йылö, а сійö, он и казавлы, кыдзи судзöдчылас.

— Но, эн пов, эн скöрав, ме тай ог нин, — шуалö Лева. — Ме тэныд уль яй тор вая.

Збыльысь, регыд детинка вайис яй тор да нюжöдіс





кыньпилы. Сійö дыр эз босът, а сэсся лёкысь нетшыштис, Лева быдсөн дрөгнитис.

— Но-о. Эн скöрав, бурасям, ме тай ог нин лёкав.— Лева малыштис кыньпилысь кымöссö. Мöдыс звирк чечыштис, самасис ёсь пиньяснас кепысьö. Лева эз нетшышт кисö, медым раммö, кыз кепысь пырыс оз мөрчыны пиньясыс. Сэсся смелмöдчис да лэптис кыньпиöс сой вылас. Кызди тай варснитас сійö детинкалысь парьяссö, быттö емөн воча вурыштисны! Лева шы оз вермы лэдзны и синьяссö повзёмысла кунис. Сэсся лэдзис жö кыньпиыд. Лева кыкнан кинас топöдис парьяссö, ымзигтыр жöдзыштис места вылас, сэсся пырис чумö. Марина чойыс мыйöнкö мавтис ранасö.

Сэсся детинка эз нин некор сибöдчыв кыньпи дорö. «Оз ков меным татшöм лёк ёртыд!»— мөвпалис зонка.



## СЮРИС ШАНЬ ЕРТ

**Б**ать козьналіс Левалы көрпиөс. Сьөдіник ёкмыль пон моз вөлі йөжгыльтчөма дадь бөжө, тіраліс көдзыдысла, синъясыс сөніка ва кодьөсь. Лева малаліс чөла куйлысь көрпиөс, но эз төд, кызди бурөдны.

— Тшыг сійө,— висьталіс батыс.— Мамыс воштөма турөб дырйи, лым пиысь сюри.

Лева котөрөн пыраліс чумө, петкөдіс тасьті шыд. Но көрпи эз исыштлы сөянсө, көть кызди Лева эз матөдлы сійөс:

— Чөскыд зэв тайө, ставөн ми чумын шыд сөям, сы вөсна и ог висьөй. И тэ бурдан.

Левалы жаль көрпиыс. Детинка эз нин өтчыд казав-

лы, кутшөм чожа котралёны стадаын көръяс, сідзи эськөн и сылы, Левалы, дурыштны көрпикөд.

— Оз сөй!— уськөдчис Лева бать дінас.

— Оз на куж сійө. Велөдам,— ышөдіс батыс.

Восьтіс пурт тышкөн көрпиысь вомсө. Лева ичөтикаөн кисьтышталіс сэтчө шыд, көрпи тяпөдчис кывнас. Лун-мөд мысти ачыс велаліс сөйны тасьтысь.

Вежон мысти көрпи вөтлысис нин дадь бөрся.

Сэсса коркө и лым сыліс, турун петіс, уна лои сөяныс көрпиы, өдйө заводитіс сөвмыны. Авкоөн нимтісны. Тадзи көр видзысьяс ыждөдлөны быд көрөс, коді мамтөг быдмө морт дінын.

Лева радейтө Авкоөс. Петас водз асылын чумысь, чукөстас:

— Авө-ав!

Көрпи уськөдчө көзяин дорө. Но Лева оз жө прөста кор, дась няньторйөн чөсмөдны. Медся любө Левалы Авколөн вильшасьөм-люкасьөмыс. Небыдик гөна сюрнас сійө быттьө гильөдчө. Но аръявылыс чорзис сюрис, ёсь лыө пөрис. Оні Лева мөд ногджык ворсө, каяс дадь вылө и манитө ас дорас көрөс:

— Лок, эн пов, ог немтор кер, лок.

Авко видзчысьөмөн сибөдчө дадь дорө, детинка чечыштө сылы мыш вылас, верзьөмасьө, но көрпи нөрөвтыштө, и Лева гывдө люллялысь керч вылө. Бур на, мус небыд, перина кодь... Лева чайтіс велөдны Авкоөс верзьөмөн ветлыны, кызди вөлөс. Сійө аддзыліс нин кинояс вылысь и сиктысь, кутшөм өдйө котралёны вөвъясыс. Лева мөвпаліс, мый велөдас Авкоөс да пановтас көр видзысьясөс, гашкө и батьсө на бөрвыв коляс празд-



никъяс дырйи. А мый, ёна тай жö ышнясьöны збой да-  
дувъяснаныс, оз и казьявны сэки Леваöс, сöмын и öлöдö-  
ны: «Эн кок улö пыр!»

Лева дözмытöдз ноксис Авкокöд, нюжöдчис дадь  
вылö мудзöмысла. Некемын лун нин вийсьö кöрпикöд,  
а тöлкыс чепöль мында эз на шед. Авко сулалис öнi дадь  
бокын да веськыда дзоргис детинка вылö, быттьö дивитис  
сийöс: «А ме со эг и мудз!»

— Часлы, ме тэныд петкöдла пуж,— Авколы шуö  
Лева. Корсис гезтор да кöрталис Авколы сьылиас, öтар  
гез помсö топыда гартис веськыд киас, кыдзи батыс  
вöжжисö.

— Чо-чо-о,— ыршасьö Лева Авко вылö. Кöрпи пер-  
войсö видзчысьöмön, а сэсся век збойджыка кутис ту-  
рыштчыны водзвыв.

Лева любöсö оз дзед, вашъялö, кытшовтис некемы-  
нысь чум гөгөр да и веськöдчис мыльк дорышöд. Дивъя,  
сöмын лэптав кокъястö, а кöрпи ачыс тiрöдас-лэбöдас.  
Лева быттьö бордъясис: пельясас тöv шутьлялö, пи-  
дзöсьясас бадь йывъяс швичйöдлöны. Левалы и кок  
улас некор видзöдлыны, тövзьö и тövзьö. Уна мыльк во-  
мöналис, весиг раскö эз йöрмы. Но öтилайн детинкаöс  
быттьö кодкö кыскыштис кок пöлöдыс, шедис, тюрис  
водзвыв, парсалис сойсö и чужöмсö. Ёнтö эськö, и забед-  
нö, но кутчысьö, кöр видзысьяс абу лябöсь. Лева кыпöд-  
чис, пыркнитис вывсьыс му ёгсö, кöсийс котöртны водзö,  
но видзöдлис бөрвылас и... ыркнитис сьölöмыс.

— Кöнi чумйыс?! Кытчö нуöдiн?— кыскыштис кöv-  
йöд Авкоöс, сэсся шыбитис гез помсö: мый пö тэысь?  
Лева вувзьысис мыльк вылö. И сэтысянь немтор эз ты-

дав, быттьо абу и вöвлöма чумныс. Бөрддзис. Авко нюлыштис бан боксö Левалысь, вешйыштис водзланьö да бергöдис юрсö детинкалань, быттьо корис: лок пö ме бöрся. Авко муныштас да бара сувтлö, виччысьыштö. Кыпöдчисны джуджыдинö.

— Со чумным!— горöдис Лева да чепöсийс Авко бöрся, чеччалис вутшкысь вутшкö. Сэсся туйсö паныдалис паськыдкодь ва гуран. Но Лева эз сувт, эз кытшовт, ёнджыка öддзöдчис да чеччыштис. Гöп мöдарас вöлöма сук няйт — и пондис кыскыны ас пытшкас зонкаöс. Коді мездас? Коді кылас сылысь горзöмсö? Чум ылын на. А Авко? Но сійö öмöй сяммас? Век жö Лева чукöстис кöрпийс. Авко матыстчис, исасьыштис, чорыдджык кок ув бöрйис, сэсся нюжöдис сюръяссö — на пö. Лева кутчысис, Авко мыджсис водз кокъяснас да кыскис детинкаöс.

Лева сывъялис кöрпийс голяöдыс, и кык друг бöр мöдöдчисны ёсь йыла-юра гортланьныс.





## ЭН УЗЬ, ЧЕРИ КЫЙЫСЬ

**Б**урджык эськө, тэ кө чери кыйин,— шуис өтчыл  
Левалы чойыс.— Шландайтан сідз жө-а.

— Мыйон?— юалис зонка.

— Важ тывсыд помсө вунды,— велөдіс Марина.

Доддын туплясис киссьом тыв, чумсаяс сійос орьод-  
лывлөны ветьок вылө. Лева сэтысь метр кузьта кымын  
аслыс тшөтш вундіс. «Мый ыджыд тывсыс,— мөвпаліс  
ачыс.— Ичөтика кө шедыштас и. Унасө некытчө лоө со-  
лавнысө».

Көрталіс тыв өтар-мөдар помө бедьяс и суйис ты бе-  
регө, коді чум дорсянь зэв матын и вөлі. Пукалө Лева  
берегын и виччысьө черилысь шедөм. А чери оз тэрмась  
тывій юрсө суйны. Пукаліс-пукаліс да и вугыртіс чери  
кыйысь.

Дыр-ө узис, Лева оз төд. Но кор садьмис, чери вөлі нин шедома. Уськөдчис тыв дорө, чуть ачыс вао оз чечышт. Видзөдө да, чериыс и шөрланьө на, морыд, турыштчөма, поводнөя кыскыштөма тывсө. Кыскө Лева ньөжйөник, төкөтьө лов шысө кутөмөн. Матыстис дзикөдз да лётөбтис косинө. Сэсся тэрыба гыпнитис-водис чери вылө, кутө, но чери оз нөйтчы, оз вөр. Видзөдө да, сьвтөм чериыс и сьөмыс абу. Падъялө Лева, босьтны-ө черисө? Татшөм чериыс батылы эз на шедлы. Лөсялас-ө сийө мамыслы да чойыслы?


Детинка, век жө, пыртис чериөс чумө. Мам и чой зэв радөсь, кыпыда нюмъялөны, со пө өд кутшөм өдйө и кыйин. Кутшөм бур чериыс, весиг керны оз ков — дась. И Левалы долыд. Кодлы нө ошкөмыд оз лөсяв!

Воис бать да пуксялісны пызан сайө. Батыыс ошкис жө Леваөс, рөсолыс пө чөскыд.

— Ветлам коркө тэкөд свежөй чери кыйны, — көс-йысис бать.

Дыр мысти нин Леваөс веськөдіс батыыс, мый сола чериыс пө ваас оз овлы. Тадзи пө тэкөд Марина чойыд кимөститчөма, асланым шомөсысь черисө суйөма тэнад тывйө.

Вот сэсся и узь чери кыйгад!





## МӨДЫСЬ ОГ ПОВЗЫ

**Б**ать эз вунөд көсйысьөмсө, збыльысь нуөдіс Лева-  
өс чери кыйны. Детинка падмыштіс, кор батыс  
сувтөдіс дадювъясөс ичөтик шор дорө да шуис:  
тані пө и кутам кыйсьыны. Лева чайтіс — ыджыд ты  
дорө вайодас, пыжөн ва мышсө кырасны. Öні сійө оз  
тэрмась чеччыны дадь вылысь: гашкө, бара на тешит-  
чöны да?

— Мый нө шонтан местатö!— шуис бать да кутчы-  
сис черө, заводитіс керавны ньөръяс.

— Тані нө кутшөм чери?— дышпырысь чеччис Лева.

— Чериа тысянь шорыс лэччө, и чериыс сэтысь петө.

— Кытчө?

— Юө.

Вис отар вомо бать лөдіс кералом нёрьяс да тшөк-  
тіс сы выло тальчыны Левалы, потшны виссо.

— Крепыда сулав, эн дзор, мед оз уйкнит чериыс.

Друг бать лыйыштіс көрт пома харейнас вао.

— Сійо од съод кер пом!— серөктіс Лева. Но сэк жө  
казяліс, кыдзи съод мышка ыджыд чери пескыльтчис.

И пыр жө кодкө быттё тувкнитіс Левалы кокас. Зонка  
лайкнитчис, лигышмуні кокыс, сэссия и чеччыштіс да  
нырвыв уөвтіс вао.

Батьыс тшапнитіс сійос малича юрбөрөдыс:

— Загреки вылас тэнө босьті...

Сэссия батьыс пөрчөдіс зонкаос, пыдзраліс ва пась-  
көмсө, сэк кості аслас маличаон кышөдіс. Ырзбөдіс би-  
пур да заводитіс косьтыны Левалысь паськөмсө.

— Кутшөма тэ манитін менө, дзоля пи,— меліа нин  
сёрнитіс батьыс. Лева чөв оліс, көть эськө личаліс жө  
нин измылөм съөлөмыс. Мый керан, ачыс мыжа; эз кө  
повззы, и чериыс эз мын, ачыс эз көтась, бать эз ма-  
нитчы. Даддё пуксис да вөлисти шыасис Лева:

— Ме, бать, мөдысь сэссия ог нин повззы. Збыль ог!





## ОЗ НА ТӨД

**М**у вылө пуксис көдзыд төв, кынтис му и ва. Лева-лы абу кивыв төлыс, гожомын моз он котрав. Быд-лаын лым толаяс, собны кө — юр вывтыд. Торйөннин мустөм детинкалы кузь лунтыръясөн аргышөн мунны. Руньгöны-руньгöны кытчöкө, собöны көръяс лым-йöд, пом ни дор оз волы. Сиктö пö тай тэрмасьöны. Вöли кө эськө Левалөн вöля, сийö некытчö эз тэрмась, гудый-сис лунтыр лым тола пиын.

Детинкаос тубралöмаось юр вывтыс, көр вольясөн да гезйөн көртавлöмаось мамыс дадь бöжö. Тани Левалы шонид, ымралö питшөгас, но дöзмöдö кузя мунигад. Муртса на мыччыштас нырсö, пыр и курччас сийöс веж көдзыдыс. Мамыс сидзи нимтö төвсö, веж көдзыдъяс пö пуксисны. Левалы öткодь, веж көть гөрд, öтмоза кык-нансö мустöмтö.

Рытьявыв детинкалөн заводитö сюмавны кынöмыс,  
и сійö корö нянь. Марина чойыс мыччис из кодь чорыд  
няньтор. Лева гирсйöдліс пиньяснас.

— Небыд нянь вай!— корис Лева.

— Абу. Веж кöдзыдыс сёйис,— вочавидзис Марина.

— Сылөн абу вомыс!— горöдіс Лева.— Кöдзыдлөн  
абу вомыс, эн пөръясь, Марина.


— Но, кынмис инö няньыс,— пыксис чойыс.

— Нянь оз кынмы, сійö абу ва!— оз öвсы Лева,  
заводитіс сыркъявны.— Кöні небыд няньыс, кытчö  
лотін?

— Авкоыд став няньсö пазйöма.— Мариналы окота  
öдйöджык мынтöдчыны зыньгысь детинкаысь.— Ачыд  
тöдан, кутшöм лют сійö няньöдзыд.

Лева ланьтіс. И збыль, Авко ёна радейтö няньтö.  
Сійö, дерт, и пакöститчис. «Медым волам местаö, медым






мынла тайö гезъяссыс,— ыршасис думнас Лева.— Петкөдла ме сылы, нювсыйсылы, пуж».

Коркө аргышаяс сувтисны чумъясьны, мынтөдисны дадь бөжысь Леваос. Сийö пыр и ырыштчис Авко вылө: — Ок тэ, яндысьтөм, пазөдін став небыд няньсö!?

Авко веськодя дзоргис Лева вылө, исасис, нянь корис. Тайö содтөд пузьөдис детинкаос. Сийö кватитис бедь да бөрдигтыр уськөдчис көр вылө, пондис кучкавны сюрас и юрас, котралис Авко бөрся, судзөдчис пөвсыштны мыш кузяис. Медбөрын Авко ылыстчис чум дорысь,— скөрмис жö.

Сэксянь Авко оз нин леститчы Лева динө, таысь забеднө. Весьшөрө кедзөвтис ёртсө. Детинка öнi ачыс төдö: көдзыд дырйи и нянь кынмө, из моз чорзьö, ас-лас синмөн аддзылис, кыдзи чумын, пач дорын, сывдисны кын няньсö. И сийö бөр лои небыд, чөскыд.



## ТУНДРАСА КУТШ

**Л**ева — мыйон помнитө, век нин батыслөн дадь бөжын дзоръявліс, быттё сәні и чужлөма. Сідзи тай овлө: зонпосниясыд бать дінаджык сюртчөны. Өд дадюв көръясыс сылөн пелькджыкөсь и быдлаті шуркъялөны. Тадзинад унджык аддзылан, унджык төдмалан.

Но талун Лева йөршитчөма мамыс дадь бөжө. Талун сійө лөгалө батыс вылө. Мамыс — аргыш нуөдысь. Аргышyd сійө кыдзи обоз, сөмын дадьяссө оз вөвъяс кысыны, а көръяс. Аргышсө колө нуөдны видзчысьөмөн, сы вөсна мамыс тшөкыда видзөдлывлө бөрвыв, медым дадь эз пөр. Дадьясын көр видзысьяслөн көлуйыс, сөян-юан, сәні жө оланіныс, чумныс, тубрасалөма.

Лева мамыслөн дадь бөжын быттьо домом кыньпи, окота чеччалыштны, вотосасыны, панласыны, вермасыны росъяскөд, но полө кольомысь. Да и мамыс оз лэдз дадь вывсьыс.

Ывла вылыс талун оз жө ёна ышөд Леваос. Со тыяс пласьтвидзёны. Шоръяс вомонавлёны туйнысө, но оз жө аргышсө потшөсавны: мамыслы пыр и сюрө вуджан-иныс. Васөд нюръясті собоны, найө кушөсь либө сук турунаось. Туруна нюрөдыс көръяс ёна болскёны кокъяс-наныс, резёны няйтсө, тешкодя тракйёны дадьсө, Левалы быдсөн любө лолө. Но өд нюрыс абу помтөм. Паныдасис кө эськө паськыд ю, сэки мамыс быть сувтис и чомъя-сисны, но юыс оз тыдав некөн.

Сэсся Лева заводитө мөвпавны — и мөд пөлөс олөмө волө. Көръясыс быттьо лоёны ичөтикөсь, кыньпиян кодьөсь кымын. Сэки Лева көзяин на вылын. Ыджыд көръяснад өд мат, кольөм төв на өти көр малича пөлаөдыс сюр йылас лэптыліс. Лева ёнакодь повззыліс сэки. Со Лева батыс моз жө нярталаөн куталө ичөт көръясөс, лямкаалө аслас ичөтик даддьө, дөзьөритө стада, весиг бөрийө, кутшөм местаө сувтөдас чумсө, кытөні кутас йирсьөдны көръясөс. Дерт нин, медся нитшкаинас! Векджык аддзө ассьыс стадасө мича мыльк вылысь, югыд ваа ты дорысь. Шылыдынас көръяс век син улын, а тыыс мытшөд, көдзыд ваас коді келас? Лева полө сук расысь, пырасны көръясыд сэтчө да и вошөны. Лева чайтө керавны став рассө, но видзөдлө, кутшөм паськыда да тшем быдмө сійө васөдінъясын, и ыркмунлө сьөлөмыс. Отнас оз берт, а ёрт абу, гырысьджык чой-вокыс сиктын олөны, гожөм кежас пионерлагерө мунісны. Леваос

вертолётон вайисны бать-мам дінас. Лева первой класс помаліс, октябренок öні сійö.

Сэссия Левалы бара на сувтö син водзас тöрытьяыс. Чомныс сулаліс джуджыд мыльк йылын. Гөгөр тыдалісны сэтшöм жö гырысь мылькъяс. А на весътöд довъяліс съод лэбач. Качліс сійö вылö-вылö, лоліс ичөтик съод чут кодьöн, сэссия из моз уськөдчыліс мулань. Чайтан, пом нин, чорыд изйö пасьмунас. Но оз. Дзик нин му дінсяныс лыйыштліс енэжö и дыр сэні шлывкъяліс бордъяснас ньöти шенасътöг.

Батьыс висьталіс: тайö пö тундраса кутш. Сійö пö көзяин тундраса олысьяс пöвстын. Тайö збой да вына лэбачыс пö некымын верст оз сибöд аслас поз дорö ни ручöс, ни кыньöс, весиг көин полö сылөн ёсь гыжъясысь. Сöмын пö морт вермö сибöдчывны кутш поз дінö, но морт оз жугöд сылысь позсö. Öд кутш поз дорын пö позьö бура кыйсыны. Кутш оланін дорö поздысьöны чукөрөн уткаяс, дзодзөгъяс. Кутш пö видзö налысь позьяссö быд сикас зверьясысь. Дерт, оз весь, арнас пö ачыс кутас чöсмасьны утка да дзодзөг пиянөн, но ыджыд чукөрсыйд оз ёна и тöдчы.

Тöрыт батьыс шыбитіс дадь вылö капканъяс, Лева пыр жö сирасис дадь бөжö. Батьыс букыша видзөдліс, быттö вöйпис: водз пö на тэныд, но Лева эз чеччы, сöмын ёнджыка кутчысис дадь көртöдас.

Шор лунвыв пөкатысь öта-мөд бөрсяыс кыпөдчалісны дзодзөгъяс. Лева первойысь на аддзö татшöм матысянь дзодзөгъяссö, найö шпорөдчöны водзын и бокъясын, мукөдыс дзик көр кок улысь жбыркнитасны, таысь матысса көр бокывыв чеччыштлö. Серко ыштыліс жö вөт-



лысьны дзодзөгъяс бөрся, но регыд никсигтыр уйыштіс дадь улө. Кутш лыйыштліс енэжсянь да котшнитіс көрт кодь нырнас пон юрө. Сэссия Серко эз нин мыччысьлы дадь улысь.

Бать ноксис капканъясөн дзодзөг поз дорын.

— Мый нө каран?— юалис Лева.

— Дзодзөг кыям,— шуис батыс.

— Сэссия быдтыны кутам, да? Мед оз пышъявны, да?

Батыс мыйкө сөмын нурбыльтіс вомгорулас.

Талун водз асывнас ая-пия мунісны капканъяс дінө. Воисны дзодзөг чукөрө. Лева видзөдө: өткымынөн оз вермыны чеччыны поз вывсьыныс, лёкысь нетшкысьоны сөмын. Лева төвнас тадзи жө сибдыліс юкмөс дорө малича бөжнас: гудрасис юкмөсас роскөн и эз и казявлы, гөлөс быртөдзыс лои горзыны, кытчөдз эз перйыны. Татшөм жө өні көнкө и дзодзөгъяслы, со тай кыдзи пессьоны, повзьөмаөсь дзикөдз и. Мыйла нө сиасисны эськөн, мед нин вөля вылын гуляйтөны. Усис Левалөн сьөлөмыс — абу и ньөти окота быдтынысө найөс.

Батыс чеччыштіс даддысь да уськөдчис первойя дзодзөг дорө. Лева чайтіс, сійө өні мынтөдас дзодзөглысь кокъяссө көрт налькйысь, и гого лэбзяс. Но батыс друг песовтіс дзодзөглысь юрсө, дзодзөг турыштчис и лётмуніс. Тадзикөн батыс мөдлысь, коймөдлысь. Левалөн сөдзтысис синваыс, лы кодь ёкмыль тасасис голяас. Сэтшөма лөгыс кутіс петны батыс вылө. Юрсө чатөртліс вывлань, думсьыс корсис кутшөс. Сійө здукас сылы окота вөлі, мед эськө тундралөн көзьяиныс кокыштіс батысө. Но кутш эз тыдав кымөръяс сайысь.

Сэки Лева тэрыба сувтіс. Дзодзөг поз вылысь казяліс

кыйтөм на капкан. Дерт, сэтчө бара на выль дзодзөг шедө. Колө кыйны капкансө, кытчөдз абу на сёр. Со капкан таяныс, сөмын колө сэтчө личкыштны... немтор матын абу. Гашкө, зэв тэрыба чуньон? Лева лөсьөдчис батыслы бокон, личкыштіс чуньнас капкан таянсө и... шедіс. Лёкысь горөдіс. Батыс уськөдчис горөдөм вылас:

— Мыйла нө чуньтө сюян, кытчө оз ков?!

— Тэ, тээ-э менө-ө-ө пө-ө-өрйөдлін,— сыркъяліс Лева.

— Пөръялі?! — чуймис батыс.

— Дзо-дз-дзө... ви-и-ин.

— Вии? Ме? Капканө шедөма вөлі...

— Мыйла эн лэдз-аав?

— Лэдзавны?!— бать гыжъялыштіс балябөжсө.

— Да тэ, тэ лёк, лёк... выльысь на сиасин,— Лева бара гораа бөрддзис.

Батыс вөлі дзыкөдз шөйөвшөма.



## ЮРИНДАЛЫСЬ

Левалы гажтӧм . . . . .	3
Сюрис шань ёрт . . . . .	6
Эн узь, чери кыйысь . . . . .	11
Мӧдысь ог повззы . . . . .	13
Оз на тӧд . . . . .	15
Тундраса кутш . . . . .	18

*Для младшего школьного возраста*

Егор Васильевич Рочев

ЛЕВА

*Рассказы*

На коми языке

Художник М. М. Погребинский

Редактор В. А. Попов

Худож. редактор А. В. Мошев

Техн. редактор А. Н. Вишнева

Корректор Е. П. Сидорова

Сдано в набор 21/II-1972 г. Подписано к печати 7/IV-1972 г. Формат 60×84<sup>1</sup>/<sub>16</sub>. Бум. л. 0,75; печ. л. 1,5; (Уч.-изд. л. 1,1). Заказ № 890.  
Тираж 3000. Цена 5 коп.  
Коми книжное издательство, Сыктывкар, Дом печати.

\* \* \*

г. Сыктывкар, Республиканская типография Управления по печати  
при Совете Министров Коми АССР.

5 коп.



КОМИ КНИЖНОЙ ИЗДАТЕЛЬСТВО 1972